

կրակովի արքեպիսկոպոսն ասել է «Աղաչում եմ Աստծուն, որ լեհ ժողովրդին հասկացնէ, թէ ճիշտ է իր քաղաքական օգուտը և չընկնէ իր առաջ դրած թակարդը: Քահանաները եկեղեցում քարոզում են ընդդէմ դօրաժողովի, որը յօգուտ գերմանացոց է միայն:

ՍԵՐՔԻԱԿԱՆ ԵԿԵՂԵՑԻ.

Կօրֆու կղզում ապաստան գտած սերբիական Դիմիտրի միտրօպօլիտը մի նամակով յայտնում է Միխայիլ վարդապետին, որը Մոսկուայում է գտնուում, սերբիական եկեղեցու ներկայ դառն վիճակի մասին:

Միտրօպօլիտը յայտնում է, որ գաղտնի տեղեկութիւն է ստացել, թէ Բօլգարիայում գտնուող սերբ քահանաներից մի մասը վախճանուել է սարսափելի ուղամտոնների մէջ գտնուելու պատճառով, մի մասին էլ բօլգարներն են սպանել: Սերբիայում միացած քահանաները զրկուած են ծխերից, նրանց տեղը բռնել են բօլգար քահանաներ, որոնք սերբ ժողովրդի խղճի և կրօնական հաւատալիքների վրայ սարսափելի բռնութիւն են գործ դնում: Նոյն տեսակի դրութիւն է իշխում և աւստրիացիների գրաւած սերբիական մասում:

Միտրօպօլիտը յոյս է յայտնում հզօր Ռուսաստանի օգնութեամբ ձմեռը վերադառնալ հայրենիք: Այն ժամանակ մեծ օգնութեան կարիք պիտի լինի. 500 եկեղեցի նորից կառուցանել, եկեղեցական գրքերը, սպասները, զանգերը, որոնք ոչնչացուած են նորից պիտի գնել:

Միտրօպօլիտը խնդրում է դիմել ռուս ժողովրդի կրօնաշնորհական օգնութեան և ժողովարարութիւն անել, որ վերադարձից յետոյ հնարաւոր լինի բաւարարել ժողովրդի հոգեւոր կարիքները: